

ULTIMO

NOTICIA

ARUBA

INDICACION FUERTE CU TIN ORO Y PLATA NA ARUBA

ORANJESTAD (NOTAR) Como un confirmacion di un primicia di ULTIMO NOTICIA a trece Dialuna ultimo, ayera tardi den Surfside tabatin un conferencia di prensa unda cu Sr. Leliever cu ta presidente y accionista mayoritario di Monte Carlo Gold di Canada a duna splicacion di varios di su proyectonan cu e personalmente y tambe algun di su companianan tin pa Aruba. Sr. Leliever tur su vida a dedica su mes y ta pertenece na un famia Canades cu semper a dedica den mineria di oro, a splica cu e tin conocimiento di nos historia di explotacion di oro den temponan atras y loque el a mira y sin estudio cientifico ainda a constata e tin base suficiente pa kere cu ainda mester tin oro di hopi calidad na Aruba y cu cabalmente durante di e conferencia di prensa, abogado Brown a haci entrega oficial di un permiso cu Gobierno a concede su compania pa haci exploracionnan na Aruba den busqueda di metalnan preciosos y no unicamente oro. E inversionista Canades a muestra prensa un muestra di piedra cu el a haya na Aruba cu a simple vista ta muestra di ta contene oro, pero tambe cu ta contene koper. Si no tabata na Aruba, lo por tabatin sospecho cu e por ta loque nan ta yama na ingles "fools gold", pero esaki no ta existi na Aruba.

Cu permiso di Gobierno den man, cu por cierto el a splica, cu hendenan na Aruba a coment'e cu si e pidi permiso na Gobierno esaki lo bay dura varios aña pa e logra haya un decision, Sr. Leliever tabatin palabranan di elogio grandi pa Gobierno cu den un tempo sumamente cortico, y eficiente a brind'e tur informacion y ademas a dun'e e permiso di exploracion minero den nos suelo. Ta ser spera un ingeniero geologo di su compania cu mester yega awe pa prepara yegada di un avion especial cu equiponan moderno y sofisticado pa haci exploracion di henter e territorio di nos isla cu lo dura apenas 5 dia, pero lo tuma basta siman pa descifra tur e informacionnan cu nan haya. Inicialmente su compania lo inverti 2.5 millon di dolar den e exploracion aki cu ta un suma sumamente chiquito, si mester resulta cu ta factible explotacion di oro o otro metalnan preciosos ariba nos isla, y cu lo ser poni pa haya financieramente publico extranhero pa cuminsa opera rapidamente y cu hasta prome cu tur e datonan ser analisa, su persona cu no tin un estudio grandi den e asuntonan aki, pero si un experiencia di un vida completo, lo por indica cu unicamente mira e resultado di e exploracionnan cientifico, kico lo por spe-

ra y cu el lo duna esaki na conocimiento di tanto nos Gobierno como publico. E estudionan geologica lo duna luz tambe exacto di e verdadero formacion di nos isla. Loque antes tabata dificil pa explota oro cu man, manera el a tuma lugar na Aruba, den mundo moderno cu tur e equiponan sofisticado esaki ta bira un operacion basta simpel. Nos a haya e imprecion,

for di Sr. Leliever, cu tin mas plata na Aruba cu oro mes y tambe tin platino y koper. Por spera cu ya pa April o antes di e aña aki, nos lo por haya sa algo concreto di tur e posibilidanan cu ta existi. Nos ta desea di recorda nos lectornan, manera cu nos a skirbi den nos edicion di Dialuna, nos mester ta manera Santo Thomas, hasta ver no creer y

no bay carga speranzanan falso, sino kere te ora cu nos mira e realidad.

Nos hendenan lo bay mira algun ingeniero geologo ta cana na tur parti di nos isla ta studiando e explorando, esaki lo ta nan trabao, pero no kier meen cu nan a haya oro ni cu esaki ta factible ainda, sino simplemente nan ta studiando ta kico nos tin.

Recycling Industry

SI GOBIERNO DUNA PERMISO, ARUBA POR HAYA FABRICA DI CONVERSION DI PLATA

ORANJESTAD (NOTAR) Durante di e conferencia di prensa di ayera tardi den Surfside, Sr. Leliever a divulga cu un di su companianan tin un proceso sumamente moderno di un industria di conversion, esta recycling industry, unico den mundo pa motibo cu e no ta duna polucion di lo mas minimo. E maquinaria ta consisti cu plachi fotografico manera esnan cu hospital ta sa pa x-ray, despues cu nan ser usa y warda pa un tempo limita, ta ser bentá afo (foto x-ray) y e plachinan aki ta contene plata puro y e maquinaria cu su compania tin ta masha sencillo cu ta hinca un plachi (film)

aden y e ta kita tur e plata cu e film ta contene y e plata aki ta puro. E razon pa cual e kier trece e industria di conversion di plata aki pa Aruba ta pasobra cu na Canada e clima ta causa cu nan ta gasta enormemente na coriente, pero e clima di Aruba tin e temperatura normal di e grado cu nan tin mester, sin mantene e equipo cu calefaccion artificial. E filmnan usa lo ser importa for di diferente paisnan rond di mundo y Sr. Leliever a haci un broma, cu nan tin trata na Alemania pa haya e filmnan usa caba pero ainda no tin trato cu Hulanda pa esaki.

Paisnan tanto manera Canada, Merca, varios paisnan di America Latina cu el a menciona y tambe diferente paisnan di Europa lo ta e suplidornan di e mayeria prima. Si Gobierno duna permiso pa esaki, Aruba lo por produci cu e industria di conversion aki como 2000 gram di plata pure pa dia. Segun Sr. Leliever, importacion di e pateria prima cu ta algo cu por haya casi por nada lo trece mas trabao pa nos hendenan ariba waf por ejemplu ademas di trabao na e fabrica mes y tambe lo por "mint" modenanan di plata puro cu por manda y ta acepta rond di mundo.

